







F 18

~~X. XII. VI.~~ XI. XVI. 24.





00 G.

Σ  
Jh  
Ba  
ten  
us  
S  
Bei  
sche





6

**Von Christi-**  
**cher Widwen vnd Waisen**  
stand / Reichem vorsorg/  
Trost vnd Ampt:

Aus Göttlicher Schrift zusammen gezogen.


Durch  
**Esaiam Heidenreich / der**  
Heiligen Schrift Doctor.



**Wittenberg.**

Gedruckt durch Zacharias Lehman,  
Anno M. D. LXXVII.







Der Edlen/Ernt-  
tugentsamen Frawen/An-  
na Morenbergerin / Des Edlen/  
Ehrnobesten Herrn Niclas Rhedingers  
des Eltern / hinterlassenen Wit-  
tib etc. Meiner günstigen  
Frawen.

Gottes Gnade vnd Trost in  
Ihesu Christo / vnserm wa-  
ren Erlöser vnd seligmacher  
zuuor.

**D**IE / Ehrentu-  
gentsame / vnd  
mein insondere  
günstige Fraw /  
Der heilig Apostel Paulus  
schreibet inn seiner Andern  
A ij Epf



Epistel an Timotheum / im  
3. Capitel / Das in den letz-  
ten Tagen werdē gewolliche  
zeiten komen. Je mehr wir  
aber den langest gewünd-  
scheten herrlichen jüngsten  
Tag herzu nahen sehē: Wei-  
sets sich öffentlich im werck  
aus / das die zeiten vnser le-  
betage gewollich / müheselig /  
gefehrlich / volles kammers  
vñ trübsals werden. Lassen  
vns derwegen des heiligen  
Apostels erinnerung also ge-  
lieben / Das wir derselben  
teglich mit allen frommen  
Christen



Christen zur nötigen Lehr  
oder Warnung / vnd zu rei-  
chem Trost vnserer Herzen/  
gebrauchen mögen.

Die Warnung vnd Lehr  
so vns hiemit gezeiget wird/  
ist / das wir vns den Rohē/  
sicheren / welthaußen / mit  
aller seiner Gottlosigkeit / si-  
cherheit / mutwillē vnd stolz  
nichtes lassen irren (der da  
meinet es habe noch keine  
not / man müge auff Got-  
tes Genade frey sündigen/  
Die Hell vnd der zorn Got-  
tes sey nicht so grausam vñ  
A iij heiss



heiss/als man pflegt auffm  
Predigstul dauon zu predi-  
gen: Den auch die heutige  
Welt kein Paradis/noch ein  
solch lustspiegel ist / auffer-  
halb welches / ein Christe  
sonsten kein Freud / Leben/  
Trost vñ reichthumb weis/  
sondern gerade zu nach  
Gottes Wort mus schliessē  
vnd sagen/das in der Welt  
forthin Christen zu dawren  
vñ zuleben wolt gefehrlich  
sein: Vñ das von tage zuta-  
ge viel grewliches dinges /  
sich schawen vñ sehen lesset.

Denn



Dem lieber Gott in wel-  
che ort vñ winckel der Welt/  
findet man nicht schreckli-  
che Sünden/ schanden vnd  
laster wider Gott vnd sein  
Wort? Wo höret man nicht  
klagen vber vntrew / ver-  
leumdung betrug/ morden  
rauben / stelen / etc. Wo ist  
nicht Creuz / leid vnd trüb-  
sal heut anzutreffen? Dis  
mag ja eine gewliche zeit  
sein / von welcher auch der  
HERR Christus Luc. 21.  
spricht : Das den Leuten  
wird bange sein / vnd wer-  
A iij den



den zagen / verschmachten /  
für furcht vnd für warten  
der dinge / die komen sollen  
auff Erden.

Welcher Christ die Welt  
auff dieser gewulichen seiten  
wol besihet / vñ erkennet iren  
gestanc / gewuliche Rūzeln  
vnd vngestaldt / der wird ge  
wis auff sich selbs / seinen  
beruff / seine vertrameten / ꝛc.  
gut achtung geben / vnd zu  
schawen / das er sich nicht zu  
feste seze / Sondern das er  
nach diesem zeitlichen vnd  
vergenglichen auch im ewi  
gen



gen Reich sein theil vnd Er-  
be jme durch Jesu Christi  
Blut erworben / möge be-  
halten.

Ein solch Herz wird in  
glaubigen Gebet / bey Gott  
fleissig anhalten / vnd offte  
begeren auffgelöset zu sein /  
vñ aus dem grewlichen ge-  
sicht der Welt zu kommen.

Gleichs als können sich  
dieser Apostolischen erinne-  
rung auch trösten alle die /  
so des elenden wesens vnd  
lebens in dieser schendliche  
Welt vberdrüssig sein: So  
das Joch des lieben Creutz  
A v hart



hart drucket/ vnd das Was=  
ser der trübsal viel zu schaf=  
fen machet. Denn von die=  
sem zeitlichem leben wird al=  
lein gesagt / das grewliche  
Tage alhie vorfallen / Hie  
angst / not vnd kommer  
vns drücken. Dort aber in  
jenem ewigen Reich/ haben  
wir mit allen Aufferwelten  
vnd gleubigen zugewarten/  
der frölichen herrlichen zeit/  
des waren himlischen vnd  
bestendigen liechts / dar=  
bey keines kommers / har=  
mes/ weides vnd Crueses  
ferner



ferner wird gedacht werden.

Wer diesen wechſel bedencet  
vnd gewiſſ glaubt / je grew-  
licher die zeit / dieſer letzten  
Welt gerathe / je neher kome  
auch herzu geſchlichen die  
ſeliche zeit / der ewigen ruhe  
vnd freud mit Chriſto zu le-  
ben / der wird der ehren vnd  
zeit mit gedult erwarten /  
Chriſti Troſtſprüchlein offte  
repetirn / da er ſagt. Wenn  
dis anſehet zu geſchehen / ſo  
ſehet auff vnd hebet ewer  
heubter auff / darumb das  
ſich



sich ewer erlösung nahet ꝛc.  
Wenn jr dis alles sehet an-  
gehen / so wisset das das  
Reich Gottes nahe sey.

Kan die Gottlose welt /  
grewlich vñ scheußlich sich  
stellen / mit irem Fürsten  
dem Teuffel sampt seinem  
anhang? So wollen wir  
vns dagegen rüsten / Im  
Namen Ihesu Christi vn-  
ser Erzhirten auff's ewige  
schöne thür: dahin wir durch  
die Predigt des heiligen E-  
uangelij werden gewiesen /  
vormanet vnd geleitet / die  
Welt



Welt mag der grewlichen  
Ewigen Finsternissen der  
Hellen/vñ des ewigē zorns  
Gottes gewarten: Wir hof=  
fen vnd tragen herßlich vor=  
langen / nach der frölichen  
wider vnd ankunfft / des / so  
vns vom Todt vnd ewiger  
qual mit seinē milden Blut  
vergiessen erlöset / vnd das  
reich der gnaden erworben  
hat.

Vnter des sind wir Chri=  
sten als betrübtē Pilgrams  
leutlein: So mit einander  
gefährliche Strassen bawen  
vnd rei=



vnd reisen/vorpflichtet/das  
ein-Hertz dem andern in die-  
sem Elendsthal freundlich  
zuspreche / eins das ander  
vermane / in Gottes Wort  
tröste / das wir für einander  
beten / vnd vnter teglichen  
fellen vnd gebrechlichkeiten  
einander wider auffhelffen/  
freundlich vornemen / wi-  
der Geisliche vnd Leibliche  
feindschafft / list vnd gewalt  
des Teuffels beyssammen  
stehen / Ritterlich im Glau-  
ben vnd warer anrufung  
kempffen / vnd also die Kro-  
ne



ne der herrligkeit erlangen.

In solcher frawherziger  
vnd Christlicher wolmeinüg  
habe ich Edle Ehrntugend-  
same / vnd mein günstige  
Frau / zu jecziger bekümmer-  
ter zeit / mir vieler betrübter  
Widwen vnd Waisen leid  
vnd trübsal / bey dieser Ge-  
mein lassen angelegen sein /  
vñ diese meine Trostschrift  
wider auff's newe obersehen  
vnd entlichen vnter ewrem  
namē lassen außs gehē. Für-  
nemlich darumb / das ich  
selber gesehen / wie der ge-  
trewe



trewe Gott/Euch in ewrem  
vorstehendem Alter / nach  
abscheidt ewres Herrens /  
folgendes inn wenig Ja-  
ren nach einander / etliche  
ewre geliebte Söhne vnd  
Töchter / aus diesem Jam-  
merthal / zu seinen ewigen  
gnaden auffgenommen vnd  
abgefodert hat / vnd jr Euch  
vnter all ewrem leid vnd  
vielfeltigē Creuz aus Got-  
tes Wort stetig getröstet /  
mit der frölichen Auferste-  
hung aller auserweltē / den  
Harm gelindert. Als habe  
Ich



Ich mit diesem meine für-  
nemen / Ewer gedult vnd  
fröliche hoffnüg wollen be-  
stetigen / Mit fleissiger bitt/  
wollet diesen meinen armē  
dienst mit günstigem willen  
annemen. Hiemit erhalte  
euch der Vater vñ Gott al-  
les Trosts vñ gnaden in  
Ihesu Christo vnserem Er-  
löser vnd Seligmacher / vñ  
verleihe was Euch an Leib  
vñ Seel seligliche ist / Amē.  
Geben in Breslaw den <sup>22</sup>  
Martij / An welchem das  
Weiblein zu Bethanien / im  
Hause



hause Simonis des Auffs-  
zigē/ den HERRN Chri-  
stum mit der köstbarlichen  
Salben erquicket/ Vnd hö-  
ret/ das diß ihr Werck so  
weit gerhümet sol sein/ so  
ferne das Euangelium in  
der ganzen Welt gepredigt  
wird werden: Darauff wir  
heutigis tages vnsern wa-  
ren Erlöser Christum herb-  
lich bitten/das er aus gna-  
den auch mit dem Prophe-  
ten lohn wolle erstatten/al-  
len vñ jeden/ die seiner Kir-  
chen vñ derselben waren  
gliedern



gliedern was guts vmb sei-  
nes Namens willen erzei-  
gen. Im jhar nach der frö-  
lichen Menschwerdung  
vnsers erlösers Jhe-  
su Christi/

1571.

Esaias Heidenreich/  
der heiligen Schrifft  
Doctor.



Faint, illegible text, likely bleed-through from the reverse side of the page.

Faint, illegible text, likely bleed-through from the reverse side of the page.



**Von der Widwen  
vnd Waisen stande / Rei-  
chem versorg / Trost vnd  
Ampt.**

**Das erste Theil.**



**S**erecht Chri-  
stliche Liebe heist/  
Trauren mit den  
traurigen / Sich  
der elenden vnd  
dürfftigen erbar-  
men. Derhalben / das wir der  
Widwen vnd Waisen elend desto  
bass glauben / vns desselben mehr  
annemen / sol das erste hie zubetra-  
chten sein / Wie ein elenden  
Stand / Widwen vñ Wei-  
sen / hie auff Erden führen.

B iij

Als



Als Gott der **HER** nach  
erschaffener Welt / den erste Men-  
schen zum Herren ober alle Crea-  
turen eingesetzt het / vnd Adam  
im standt der waren vnschuldt le-  
bete / spricht er von desselben we-  
sen vnd wandel: **ES** ist nicht  
gut / das der mensch allein  
sey / Ich wil im ein Gehülff-  
fen machen / die vmb in sey:  
Mit diesen Worten erzehlet vnser  
**HER** Gott / des Menschen hie  
auff erden vnter zeitlichen Rech-  
thümern / vornembsten Schatz /  
welcher ist ein trewer Ehegenoss /  
oder Gemahl / Denn durch dis  
hat der Mensch vielerley guts / ei-  
nen steten Gehülffen in seinem  
Handel vnd Wandel / einen ge-  
fertten / der in lieb vnd leid bey im  
vor



vorbleibet / nimpt in glück vnd un-  
glück mit vor gut.

Wie aber des Menschen wol-  
fart / durch den standt der heiligen  
Ehe wird nach laut Gottesworts /  
gefördert vnd gesegnet / Also ist  
hinwiderumb zu vor stehen / wo des  
armen Menschen in diesem jam-  
merthal meistens leid vnd trübsal  
stecke / Nemlich / Da er seines fro-  
men vnd getrewen Ehegemahls  
beraubet wird / durch den zeitlichen  
Todt / da es an ein scheiden gehet /  
Vnd mit jenem schier sagen mag /  
O scheiden wer hat dich erdacht.

Die Eva ward aus der Ri-  
ben der seiten des Adami geschaf-  
fen / aus dem Ort / der dem Her-  
zen am nechsten ist / Daher ist un-  
ter Christlichen Eheleuten her-  
liche brennende vnd beständige

B iij freu-



freude / liebe / in welcher sie sich  
selbs / vnd ihre Leibes fruchte vn-  
ausprechlicher weise nach lieben.  
Aus diesem Orth des hertzens /  
kompt auch / das all ihr leid / was  
sie / die Eheleutlein vnd jr Kinder-  
lein betrifft / alles zu hertz stichen  
gereth / Denn die Liebe kompt her  
aus dem Herzen / diese fület eitel  
hertzlichen jammer vnd leid / wo  
sie ires geliebten schmerken oder  
abscheid sihet.

Vnd wiewol eines idern Got-  
selichen Ehemannes hertz / in ab-  
scheid vnd Creutz seiner Hausseh-  
ren vnd Eheweibs / ohne vielfäl-  
tige schmerken nicht sein kan: So  
sind doch izunder vnser fürneme  
gedancken gericht / das leid vnd  
die threnen Christlicher Matro-  
nen anzuschawen / denen der ge-  
trew



trewe Gott nach seinem gerech-  
ten heiligen willen ihre versorger  
vnd Pfleger / aus den augen auff  
eine zeitlang zucket / derer trübsal  
vnd angst / irer eigenschafft nach /  
Wie sie der heilige Petrus ein  
schwaches Gefesse nennet / sie viel  
schwerer drucket vnd ankumpt /  
denn den Eheman / da sie viel wehe-  
mütiger / vorlassener vnd elender  
im Creutz stehen / denn der Man  
selber .

Es ist zwar offenbar / wie  
manches freches Weib nicht wol  
harret / biss dem Manne die Füße  
recht erkalten / vnd zur Erden be-  
stattet wird / sich bey zeiten gnug  
wider nach einem andern Breu-  
tigam vnsihet : Auch irer viel  
noch bey des Mannes leben mit  
einem andern sich vorpflichten / in

B v bey



besorgen / sie möchtens vorseu-  
men / oder denn nicht darzu kom-  
men: So nemen wir uns solcher  
Todessecke leid vnd jammer nicht  
an / Sondern derer Widwen / die  
vnter ihrem leid bedencken / was  
guts sie in diesem leben nach Got-  
tes Väterlichem willen / beraubet  
sind / vnd wissen vor menschlicher  
ihrer schwachheit wenig Trosts /  
können ihnen selber nicht viel ra-  
then / finden auch bey andern nit  
viel trewes raths.

Von derer Kummer / wollen  
wir / nach dem Exempel vnser  
HERRN Gottes / der sich der  
Widwen / vornemlich in seinem  
wort / erbarmet / hic etwas sagen /  
dadurch vnsern glauben vnd lieb  
zu Gott bestetigen: Denn wir  
lieben gar billich was er liebet /  
ehren



ehren / helfen zurichten / wo er  
auch selbst mit seiner gewaltigen  
hand hilfft zugreifen. So na-  
hen vnd lieben wir vns bey Gott  
dem HErrn zu / wo wir mit glau-  
bigen gedanken vom elend seiner  
in dieser Welt vorlassenen lieben  
Mündlein vnd Widwen not be-  
herzigen / Auch selber vnter dis-  
elende Heufflin mit Glauben vnd  
seuffzen treten / in der hoffnung/  
Er werde vns aus gnaden / mit al-  
len betrübten vnd elenden erhal-  
ten / schützen vnd trösten / durch  
Jesum Christum vnsern erlöser.

Christlicher Widwen / sampt  
ihrer Waisen stand / ist ein recht  
erbermighlicher Ehrener Orden /  
dauon Menschen zungen vnd  
Schriften zu zeugen auch zu we-  
nig sein. Denn sie aller Mensch-  
lichen



lichen trew / liebe / trosts / hülffe/  
rath / beschützung vnd versorg /  
entsetzet sind. Vnd ob jemandt viel  
wolt sagen / das Widwen wider  
im Ehestandt ihres leides sich er=  
gehen können / so halt ichs doch  
mit dem alten Sprichwort / Die  
erste trew die beste. Vnd welcher  
Widwen es allhie wolgereth / die  
hat Gott desto fleissiger zu dan=  
cken. Ich als ein armer Ehe=  
püchel vnd schwacher Mensch / bit=  
te gar herzlich meinen Gott / das  
er michs nicht wolle lassen vor=  
suchen.

Im Euangelio Lucae am 7.  
Cap. wird der Widwen zu Nain  
gedacht / welcher leid so gros gewe=  
sen / das den H E R R N Chri=  
stum ihrer gejammert / vnd Er der=  
selben tröstlich zuspricht / Weine  
nicht:



nicht: Damit zu zeugen / das bey  
solchen vorlassenen Herzen / das  
gröste leid vnd Threnen stecke.

In gemeltem Euangelio / am  
18. Capit. da der H E X X Chri-  
stus wil ein Gleichnis eins hoch-  
bedrangten herzen geben / welchs  
sich in seiner noth durch hertzliche  
Gebet vnd seuffzen zu Gott fin-  
det / zeucht er eine Widwen an / so  
ihre noth vielfaltig dem Richter  
flagte / vnd nicht ablies / bis sie be-  
scheid erlanget.

Der Prophet Jeremias be-  
weinet in seinem flagliede / die  
schreckliche zerstörung der Stadt  
Jerusalem / vnd vorglechet sol-  
chen jammer / mit dem Widwen  
stand / vnd spricht: Wie ligt die  
Stadt so wüste / die vol Volcks  
war? Sie ist wie eine Widwe /  
die



die eine Fürstin vnter den Heyden/  
vnd eine Königin in den Lendern  
war/ mus nu dienen.

Die alten brauchten das /leid  
der Widwen zu erkleren / ein son-  
derlich bildt am Turtelteublein /  
Das pflegt (wie man sagt) nach  
abgang seines Ehegenossen / auff  
keinen grüenen Zweig zu sitzen /  
sondern nur auff dürre / Vnd aus  
keinem frischen Wasser zu trin-  
cken / trübet ehe das Wasser selber  
mit seinen Füßen / Begattet sich  
auch mit keinem andern nach ab-  
gang seines Ehegenossen.

Es ist ein kleglich Bilt des  
Menschen leib ohne Heupt zu se-  
hen : So ist es nach viel elender  
vmb eine Widwe / so irs heupts /  
trosts / hülff / etc. durch den abscheid  
des Ehemannes beraubet wird.

Zu vor



Zu vor aber wird solch leid desto  
größer in diesem Stand / wo ein  
hauffen vnerzogen Kindlin sein.  
Vnd ohne das / hat der Teuffel  
samt der bösen Welt / sein lust-  
lein an den Widwen / treibet mit  
ihnen das Osterspiel / mehr denn  
mit andern.

Denn ist eine Witwe noch  
jung / so seelets nicht / der Teuffel  
bessert ihr durch leichtfertige Le-  
stermeuler an ihrem Gebürts-  
brieffe / guten Namen vnd Ehren /  
sie halte sich so wol / als immer  
möglich. Denn der Mensch noch  
geboren sol werden / der jederman  
recht thu / den die Welt vnd Teuf-  
fel zurhue lasse. Ist sie aber Alt /  
so mus sie ein alt Kumpelfass  
heissen / wird nicht werdt geacht /  
das sie die liebe Sonne beschri-  
ue:



ne : Kompt wol dar zu / das ihre  
eigene Kinder sie lieber Todt/denn  
Noth sehen.

Ist sie Reich / so wil iderman  
von ihr genug haben / sie Heyra-  
then vnd zur Ehe nemen / in der  
meinung sie verstehe es nicht / sey  
ein Weib die nicht so viel anschle-  
ge brauch / als ein Man / Da er-  
holet sich mannicher Bucherer /  
Tyran / Scharhans / vntrewer  
Blutsfreundt / mannich vntrew  
Gesinde ( wie sie meinen ) ihres  
schadens / Nemen inen kein Ge-  
wissen drüber / Lachen noch wol  
heimlich in die Faust / das sie ein  
armes vnuorstendiges Weib/von  
ihrem guten recht abgedrungen /  
sie verforthellet haben/ vmb Gelt  
vnd Gut bringen.

Hie



Hie ist alle wolthat des abge-  
schiedenen Haussherrē vorgessen  
Ob dieser gleich in seinen lebenta-  
gen dem gemeinen nutz / der Kir-  
chen / Schulen / treulich gedienet /  
vnd endtlich vnder den schweren  
Amptsorgen den Geist auffge-  
ben / Da der Mund verblichen / ist  
alle danckbarkeit auch verschwun-  
den. Da findet sichs erst / das die  
da solten den Widwen vnd Bai-  
sen den besten beystand leisten / sie  
am meisten plagen vnd engsten.  
Die Welt weis von keinem danck  
nicht mehr / Der die ergsten schan-  
den vñ laster treibt / mit Bnzucht /  
Wucher vnd Geitz / des Nachkom-  
menen haben gutē platz: Was aber  
zu guter Ordnung / im weltlichen  
Regiment / vnd zu vnterhaltung  
heilsamer Lehr in den Kirchen je  
G gedie-



gedienet / denen pfleget man erst  
abzulohnen an iren Erben / was  
bey lebetage des Vatern gesparet  
ist worden.

Ist ein Widwe zu allem irem  
andern vnglück auch arm / so blei-  
bet sie ein recht Quelholtz / an die  
ein jeder die Schuhe wischt / wird  
wenig von frölichen tagen wissen  
zu sagen. Ist sie denn schuldig /  
vnd hat kein eigens herdlein / da  
sie ihren bestalten auffenthalt ha-  
be / muss sie aller Leut Narr sein.  
Es ist nicht nötig dis mit mehrern  
zuerklaren / denn es ist öffentlich  
am Tage / was Widwen vnd  
Waisen vor vnrecht / gewalt / vnd  
not widerferet. Ein Christ sehe  
sich ein wenig in der Welt omb /  
thu ein Werck der Barmherzig-  
keit / frage nach fromer Widwen  
anligen /



anligen / er wird mehr erfahren  
dann jme lieb ist.

Wo grosse Güter sind / finden  
sich auch bald Vormünder dar-  
zu / Aber mit dem gedung / das der  
mehrertheil in jren mund vnd ge-  
nies vor eingehe. Wo nichts o-  
der wenig zuverwalten ist / weil  
kein genies darben vorhanden /  
beschweret sich jederman auff's  
höchste / solche vnruhe auff sich zu  
laden. Frommen vnd auffrich-  
tigen hertzen wollen wir hiemit  
nichts geschadet haben / Es sind  
noch ohne zweiffel zu finden die  
Christlichen Gewissen / so im  
Vormündtschafft / vnd andern  
ordnung redlich vnd trewlich  
handeln / Allein sie sind dick ge-  
set / vnd gehen leider dünne auff.  
Darumb so sind Widwen vnd

G ij      Wai



Waisen hie auff erden elende verlassene betrübtte hertzen / So offt von Freund / Nachbarn / vnd Feind bey ihrem guten Recht / Stand vnd wesen / bedrenget / geplagt / vnd geengstet werden. Sind aber die / so in vnseris H E R R N Gottes Spittal gehören / darinnen er selber der Elenden vnd Francken ausswartet / irer pfleget / bis er sie wieder auff die Beine zu sich in die ewige ruhe leitet vnd füret.

## Das ander Theil.

Was haben sich verlassene Widwen vnd Waisen vnseris H E R R N Gottes zu trösten

**Z**iel vnd alles hat sich der Schawen Gottseliger Widwen vnd Waisen des rechten



ten vnd ewigen Vatters alles tro-  
stes zu frewen. Denn erstlichen ist  
er jr Eltister Liebhaber / Vormün-  
de vnd Patron, so von anfang der  
Welt biss anher / vor sie das beste  
gedacht hat / vnd ihnen als der  
Herr Himels vnd der Erden ein  
guediges Priuilegium vnd Pass-  
bartbrieff / zu besserem schutz vnd  
vnterhalt ires Leibes vnd Lebens /  
Gut vnd narung / gegeben vnd ge-  
stellet / Welcher lautet an alle  
Nation dieser Welt / An Kenser /  
Könige / Fürsten vnd Herrn / An  
alle Regenten / Amptleute / An  
alle ordentliche Obrigkeit vnd  
Vnterthanen / wes Standes vnd  
Wirten die immer sein mögen.

Stehet aber geschrieben im  
andern Buch Mosi / das 22. Cap:  
mit diesen worten : Ir solt keine

G iij

Wid.





Widwen vnd Waisen beleidigen/  
Wirstu sie beleidigen / so werden  
sie zu mir schreien / vnd ich werde  
ihr schreien erhören : So wird  
mein Zorn ergrimmen / das ich  
euch mit dem Schwerd tödte / vnd  
eure Weiber Widwen / vnd eure  
Kinder Waisen werden.

Dieser bassbart Brieff / wird  
repliciret vnd widerholet im  
fünfften Buch Mosei / des 10. Ca-  
pittels : Der HERR ewer Gott  
ist ein Gott aller Götter / vnd  
HERR vber alle Herrn / ein gros-  
ser Gott / mechtig vnd schrecklich/  
der keine Person achtet / vnd kein  
geschenck nimpt / vnd schafft recht  
den Waisen vnd Widwen / vnd  
hat die Frembdlingen lieb / das er  
ihnen Speiss vnd kleider gebe /  
Darum solt jr auch die frembd-  
lingen



lingen lieben / Denn jr seid auch  
Frembdlinge gewesen.

Hie möcht jemandt aus der  
Widwen vnd Waisen anzal sa-  
gen : Ach sol ich mich des geleits  
vnser<sup>s</sup> H<sup>er</sup>ren Gottes trösten/  
ich wüste mir nicht einen Heller  
draus zu marcken : Denn was  
ist verechtlichers heut / denn Got-  
tes Wort / dem gehorchet man am  
wenigstē / Die von Gottes Wort  
viel wissen zu sagen / dürffen gleich  
bald helffen Widwen vnd Wai-  
sen bedrengē / als andere / Drum  
dünckt mich dis<sup>s</sup> gar ein schlechter  
trost sein für ein betrübtes Hertz /  
Ich hette sorge wer sich steiff wolt  
auff dis<sup>s</sup> verlassen vnd beruffen /  
sein sachen solt wol erger werden.

Höre liebs Hertz / das so ein  
grosser hauffe der Berechter vnd

G iij      leste.



lesterer Göttliches Worts in den  
letzten zeiten / auff der Bahn ist /  
lass dichs nicht irren : Gleube du  
festiglich / vnser HErr Gott habe  
noch was für dich vbrig / Vnd wo  
du mit deinem Geleite / dir von  
Gott gegeben / gleich bey einem /  
dem andern / drittē / etc. vbel antrif-  
fest / vnd sihest man lest dich nichts  
geniessen deines Gottes / Lass  
drüm nit abe / fahr weiter fort /  
biss geduldig / bitt glimpflich vnd  
bescheiden / man wölle dich vmb  
Gottes deines obersten Vormün-  
den willen / mit rath nicht lassen /  
in deiner rechten sachen recht vor-  
nemen / Du wirst erfahren / das  
Gott etwan ein fromes hertz er-  
wecken wird / das sich deiner er-  
barne vñ armeme : Suche drümb  
Vernünfftiger / aufrichtiger /  
Chri



Christlicher Leute rath : Vnd im  
fall ob der Teuffel wider dich so  
grimmig / vnd hette alle hertzen  
wider dich / vergiffet / so wende  
dich mit deinem hertzen zu dem /  
der dich in seinem Wort / in seinen  
Gnadenschutz hat angenommen /  
dir disz Indult gegeben / dem klag  
dein leid im rechten lebendigen  
Glauben / Vnd solche appella-  
tion vermag der Seleitsbrieff vnd  
Recht eigentlich.

Dem es rühmet sich Gott  
durch seinen heiligen Geist / das er  
Recht schaffe den Widwen vnd  
Waisen / Vnd wo sie beleidigt /  
ire sachen mögen durchs Gebet /  
geschrey / bey ihme einlegen vnd  
anklagen / Alss der endtlich das  
Recht verhelffen werde. Ist der  
halben kein trost in der Welt für

G v dich



dich / so lebet ja noch der Alte  
Gott vnd Herr / so helfen vnd  
retten kan. Drumb soltu nicht  
balt kleinmütig werden / vnd mei-  
nen ob der zeitliche Trost verge-  
he / es sey dein Gott von dir abge-  
treten : Je verlassener / schwe-  
cher / elender du bist / je neher vnd  
stercker wird sich Got bey dir  
lassen finden vnd sehen / Zu dir  
treten / sich deiner annehmen. Halt  
dich getrost an sein Wort vnd zu-  
sage / klage ime deine noth / wie der  
Teuffel dich mit seinem anhangen  
vbel handelt vnd plaget / er wird  
drüberrecht richten vnd spre-  
chen.

Zu solcher versicherung dei-  
nes Glaubens / soltu mehr sprü-  
che der heiligen Schrifft lernen /  
so da zeugen / Wie dich dein Gott  
in



In seinem wort gar wol bedacht /  
hat / dir auch hie auff Erden hülff  
vnd schutz bestalt.

Im Fünfften Buch Mosei / am  
24. Cap: spricht Gott: Du solt  
das Recht des Frembdlingen vnd  
des Waisen nicht beugen: Bald  
darnach / schaffet Gott der HERR  
den Waisen / Widwen vñ frembd-  
lingen zur Ernden zeit auch was  
mit zutheilen / mit der Verhei-  
schung / auff das dich der HERR  
dein Gott segne in allen wercken  
deiner Hende.

Esaiæ am Ersten Capitel /  
spricht Gott der HERR: Helf-  
fet den verdrückten / schaffet den  
Waisen Recht / vñnd helffet der  
Widwen sachen.

Hieremix am 7. So sprichet  
der HERR Zebaoth der Gott  
Israel:



Israel : Bessert ewer leben vnd  
wesen / das ir recht thut einer ge-  
gen dem andern / vnd den Frembd-  
lingen / Waisen vnd Widwen kei-  
ne gewalt thut / vnd nicht vnschül-  
dig Blut vergiesset / so wil ich in-  
mer vnd ewiglich bey euch wonen.

Zachariae am 7. Cap. spricht  
Gott / Richtet recht / vnd ein jeg-  
licher beweise an seinem Bruder  
Güte vnd Barmherzigkeit / vnd  
thut nicht vnrecht den Widwen /  
Waisen / Frembdlingen / vnd Ar-  
men / Vnd dencke keiner wider sei-  
nen Bruder etwas arges in sei-  
nem herzen.

Im andern Buch Maccabeo-  
rum / am 3. Cap : wird gerhümet /  
Das der Widwen vnd Waisen  
Gelt zu Trewer hand eingelegt  
im Tempel des HErrn sey verwa-  
ret



ret worden : Widwen vnd Wai-  
sen Gut / ist als ein Kirchen Gut  
von ihnen gehalten worden / an  
dem sich niemand sol vergreifen.  
Solt heut manicher einreumen /  
was er von Widwen vnd Wai-  
sen Gütern / zu vnrech hat abge-  
zwacket / er würde nicht viel be-  
halten.

Beim Syrach am 4. Capit-  
tel / sagt der heilige Geist : Halt  
dich gegen den Waisen wie ein  
Vater / vnd gegen ihre Mütter /  
wie ein Haussherr : vnd setzet die  
belohnung baldt mit den worten  
darben / So wirstu sein wie ein  
Sohn des Allerhöchsten / Vnd er  
wird dich lieber haben / denn dich  
deine Mutter hat.

Allen aber vnd jeglichen Gott-  
fürchtigen herzen / sie sind was  
standes



Standes sie wollen / denen die-  
ser gründtlicher bericht vnd wil-  
len Gottes fürkompt / vnd ange-  
kündigt ist / wird ohne zweiffel zu-  
gemüt gehen der Väterliche be-  
fehlich / Vnd sich derwegen vmb  
Witwen vnd Waisen elend mehr  
annemen : In der vertroöstung /  
Das Gott der H E X X hinwi-  
der sich aus gnaden irer Widwen  
vnd Waisen wird erbarmen / die-  
selbige mit desto reicheren Trost  
vnd Hülff versorgen.

Auch möchte jemandt hie ein  
nachdencken haben / Das die an-  
gezogenen Sprüch aus dem Al-  
ten Testament genommen sein /  
vnd vermeinen / im Euangelio sey  
der Widwen gar vergessen. So  
sollen wir zu vorgehenden ernstern  
vermanungen des heiligen Pau-  
li rath



li rath anhören / der schreibe in  
der ersten Epistel / an Timothe-  
um im 5. Cap: solche wort: Eh-  
re die Widwen / welche rechte  
Widwen sind. Vnd Jacobus der  
Apostel im 1. Capitel schreibet:  
Ein reiner vnd vnbefleckter Got-  
tesdienst / für Gott dem Vater ist  
der / die Waisen vnd Widwen in  
ihrem trübsal besuchen / vnd sich  
von der Welt vnbefleckt behalten.

Nach diser meinung wird in bei-  
den Testamenten einhelliges lauts  
der Widwen vnd Waisen Stand  
vns Christen treulich befohlen.  
Vnd weil wir alle / vnser ankunfft  
nach / für Gott selbs Waisen sein /  
vom ewigen Vaterland / wege der  
Sünde verstorben / sollen wir zur  
dancksagung vnser Erlösung / der  
wir vmb Jesu Christi verdienste  
willen



willen gewarten / desto williger  
anderen leiblichen Widwen vnd  
Waisen geneigt sein : Das der  
Himlische Vater aus Barmher-  
zigkeit vns in seiner Gnade beste-  
tige vnd erhalte.

Zum Andern / Sollen sich  
Widwen vnd Waisen trösten vnd  
erquicken vnter irem leid / mit den  
reichen Verheischungen / die inen  
Gott für sich selbst zusagt. Jetzt  
haben wir gehört / mit was Im-  
munitet vnd freyheiten er sie vn-  
ter dem Menschlichen geschlecht  
vnd bey seiner Kirchen begnadet  
hat : Nu wollen wir hören auß  
seinem heiligen wort / was er inen  
für zusage thut.

Im 10. Psalm zeuget der liebe  
Dauid / was Gott bey den verlas-  
senen zusehe / vnd spricht : Du si-  
hest



hest ja/denn du schawest das elend  
vnd jammer / Es stehet in deinen  
henden/ die Armen beschlens dir /  
du bist der Waisen helffer : Das  
verlangen der Elenden hörestu  
H E R R / Ir hertz ist gewiss/das  
dein Ohre drauff merckt / das du  
recht schaffest den Waisen vnd den  
Armen / Das der Mensch nicht  
mehr troke auff Erden.

Das vnglück vnd Creutz/das  
hie Christen vnter henden kömpt/  
gleubet vnd sihet nicht jederman/  
Daher die Deutschen sagen: Nie-  
mand weis wo einen der Schuch  
drücket/denn der in am fusse tregt.  
Also der vnder dem Creutz stecket/  
kennet vnd weis / wie ein bitter  
Salat das Creutz ist / Der ander  
vnuersucht hauffen / helts für ei-  
nen spott / gleubet nicht dem elen-  
den.



den. So ist hie ein grosser Trost  
für ein Elendes hertze / dem Nie-  
mand sein Creutz vnd dürfftigkeit  
gleuben wil / dem sihet vnser HErr  
Gott zu / hilfft ime sein Creutz tra-  
gen vnd lindern.

Es ist lieblich gesaget: Tu so-  
lus laborem & dolorem con-  
sideras, Die Welt ist mit ihrem  
Gott dem Teuffel star Blind in  
den sachen / Gott der HErr sihet  
alleine recht / dem klage / zeige vnd  
erzele / mein Christ / deinen schaden  
vnd not / er wird dich mit Beter-  
lichen liebes euglein ansehen / vnd  
dich freundlich trösten / dir durch  
sein heiliges Wort tröstlich zu-  
sprechen.

Darnach ist disß auch zu mer-  
cken / das der heilige Geist sa-  
get / Es stehet in deinen Henden /  
Des



Des Himlischen Vaters Hende  
sind mechtig vnd starck genug zu  
helffen / dem sollen wirs vertra-  
wen : Vnd das noch mehr ist / so  
heists / Tibi derelictus est pau-  
per, pupillo tu eris adiutor. Es  
weiss ein Armes geplagtes Hertz  
offt weder aus noch ein in der  
Welt / der Teuffel ist ihme in allen  
winckeln entgegen / So sey Gott  
dem H E X X N Lob / Ehr / vnd  
danck gesagt / das er der Elenden  
vnd Waisen helffer genennet vnd  
erkant wil sein / wie solches in sei-  
ne Heiligen zu aller zeit höchlich  
nachgerühmet haben :

Als David im 27. Psalm  
thut / Da er spricht / Mein Va-  
ter vnd Mutter verlassen mich /  
Aber der HErr nimpt mich auff.  
Item im 72. Psalm : Er wird den

D ij Ar.



men erretten/der da schreiet/ Vnd  
den Elenden / der keinen Helffer  
hat : Er wird gnedig sein dem ge-  
ringen vnd armen / vnd den See-  
len der armen wird er helfen Er  
wird ire Seele aus dem trug vnd  
freuel erlösen / vnd ihr Blut wird  
thewer geacht werden für ihme.  
Item im 73. Psalm : Du heltest  
mich bey meiner Rechten Hand/  
Du leitest mich nach deinem rath/  
vnd nimpst mich endlich mit ehren  
an / Wenn ich nur dich habe / so  
frage ich nichts noch Himmel vnd  
Erde. Wenn mir gleich Leib vnd  
Seel verschmachtet / so bistu doch  
Gott allzeit meines herzen Trost  
vnd mein theil.

Bedencke hie mein Christ /  
was habe ich vnd du dergleichen  
Gott zu dancken? Aus was gros-  
sem



sem Unglück / gefahr des Leibes  
vnd der Seelen / hat mich vnd dich  
dieser H E R R offit errettet / viel  
franckheit gelindert / dem Teuffel  
gestewret / das wir im nicht sind  
zu theil worden.

Im 68. Psalm stehet: Sing  
get Gott / Lobset seinem Na-  
men / Machet Bahn dem / der da  
sanfft her fehret / Er heisset H E R R /  
vnd frewet euch vor im / Der ein  
Vater ist der Waisen / Vnd ein  
Richter der Widwen / Er ist Gott  
in seiner heiligen Wohnungen.

Es wil der heilige Geist / mit  
herzlichem frolocken Gott den  
H E R R gepreiset haben in dem /  
das er sich der Widwen annimpt /  
vnd lest sich nennen ihren Vater  
vnd Richter. Hie auff Erden ist  
es eine grosse wolthat Gottes an

D iij Men-



Menschen / das er einen trewen  
frommen Vater hat / Vnd in der  
zeit des anligens / ein günstigen  
Richter findet. Wieviel ein vn-  
aussprechlicher herrligkeit ist a-  
ber dis / das Widwen vnd Wai-  
sen / Gott zum rechten Vater vnd  
Richter haben.

Diss Väterliche hertz / sollen  
Widwen vnd Waisen in iren nö-  
ten vnd trübsal anfliehen / Vnd da  
men vnrecht vnd gewalt geschie-  
het / sollen sie sein Richteramt  
seiner Gewalt vnd Maiestet tra-  
wen vnd glauben / er sey stercker  
vnd mechtiger / denn aller Feinde  
gewalt vnd Macht ist.

Da die Christliche Kirche das  
höchste vnd fürnembsste bekentnis  
ires Glaubens an Gott mit kur-  
zen vnd einfeltigen worten verfas-  
sen



sen hat wollen / Spricht sie im ein-  
gang / Ich gleub in GOTT Vater /  
etc. Das ist der Tittel / mit welcher  
sich vnser hertz durch festen Glau-  
ben gegē Gott zuliebet: Vnd nen-  
nen GOTT vnsern Vater / wegen  
vnser erschaffung / iure creationis,  
der den ersten Menschen nach sei-  
nem Ebenbild geschaffen hat.

Darnach ratione Guberna-  
tionis, Denn er allein durch seine  
Weisheit regieret / vnd versorget  
vns. Ferner des Vaters Tittel  
eigen wir Gott dem HERRN zu /  
ratione Adoptionis: Denn er  
hat aus gnaden vmb seines lieben  
Sohnes willen vns für Kinder  
auffgenommen.

Auch letztlich heissen wir ihn  
Vater / ratione Donationis:  
Denn er ist der Vater / von dem  
D iiii allein



allein alle gute Gaben zu vns ko-  
men. Derhalben so oft wir Chri-  
sten dieses allerliebsten Vaters  
im Himmel Namen hörē oder auss-  
sprechen / Sollen wir erstlich an  
sein Väterlich hertz vnd willen ge-  
gen vns / in seinem heiligen Wort  
vnd Sacrament offenbaret / ge-  
dencken / Wie er für vns sorge an  
Leib vnd Seele / etc. Zum an-  
dern / sollen wir alle vnser hoff-  
nung / vertrauen / auff diesen Va-  
ter alleine stellen. Zum dritten /  
befleissen / wie wir im mit Kindli-  
cher pflicht vnd vnterthenigkeit  
auch folgen / dienen mit rechter  
ehre / nachfolgung in liebe vnd  
Barmhertzigkeit gegen vnserem  
Nehesten / in gehorsam / in gedult /  
durch allerley trübsal.

Niemand sey so verstockt / der  
nicht



nicht oft dieses Vaters im besten  
gedencke/in rhüme vñ preise. Vnd  
das ich armer Erdenkloss ein of-  
fentlich zeugniss meiner danck-  
barkeit vor dem ewigen Gott hin-  
der mir lasse/Dancke ich heut/als  
ein elender Waise / einer armen  
schwachen / vnd betrübten Wid-  
wen Son von herzen / so viel in  
dieser schwachheit möglich / die-  
sem Vater vnd Richter der Wid-  
wen vnd Waisen/das er mich von  
Christlichen Eltern ans liecht die-  
ser betrübten Welt hat kommen  
lassen / von Kindtheit auff biss da-  
her ernehret / wunderbarlich er-  
halten / Vnd rhüme vor das grö-  
ste / das er mir seines allerliebsten  
Sohnes Jesu Christi seliges er-  
kenntnis verleihen/vnd zum Erben  
des ewigen Lebens hat beruffen /

D v Vor



Vor diese vnd alle andere Gaben/  
wil ich in durch seine Gnade vnd  
hülff mit der ewigen Gesellschaft/  
seinen Himlischen Hausgenossen  
hefftiger / mehrer / bestendiger /  
denn in diesem Jammerthal (da  
die freude nicht allwege von her-  
ken gehet) preisen vnd ehren.

Im 146. Psalm spricht Da-  
uid/der HERR behütet die Frembd-  
linge vnd Waisen / vnd erhalt die  
Widwen / vnd feret zurück den  
Weg der Gottlosen. Der Him-  
lische Vater helt wache ober Wid-  
wen vnd Waisen / erhalt vnd trö-  
stet sie das sie vnter irem leid nicht  
verzagen/ Behret / stewart / vnd  
hindert des Teuffels vnd böser  
Menschen giftige anschlege / mit  
welchen sie gedenccken zu schaden  
den fromen.

Saloz



Salomon der Weise König  
spricht in seinen Sprichwörtern  
am 15. Cap: Der Herr wird das  
Haus der Hoffertigen zubrechen/  
vnd die Grenze der Widwen be-  
stetigen / Weil die Welt in irem  
Tollen sinne wenig nach Gott /  
Erbarkeit vnd rechten fraget / we-  
re zu besorgen / sie würde keinem  
Christen bey ihr lenger platz gön-  
nen / wenn nicht der Trost were /  
das der gewaltige Gott im Him-  
mel jr köndte wehren / vnd der sei-  
nen Grenzen befestigen.

Darumb sollen Widwen vnd  
Waisen ihr habe vnd Gut / es sey  
viel oder wenig / mit gleubigem  
Gebet Gott dem Herrn einstel-  
len vnd befehlen / Dieser wird kei-  
nen schaden lassen geschehen / son-  
dern allem vbel stewart.

In



In jetzt gemelten Sprichwörtern / gedencet der heilige Geist auch am 23. Cap: der Elenden / vnd spricht: Treib nicht zu rücke die vorigen Grenzen / vnd gehe nicht auff der Waisen Ecker. Hie heists / Noli me tangere, es ist gros gefahr dabey / denn so folget: Denn jr Erlöser ist mechtig / der wird ihre sachen wider dich auffführen. Widwen haben einen solchen beystand an Gott / der noch nie keine sachen verloren hat / sondern alle erhalten / Drum halt an dich / lege dich nicht mit diesem Herrn zu felde / du möchtest nichts oder wenig gewinnen.

Jhesus Sprach im 35. Cap: lernet die Widwen vnd Waisen / wes sie sich auff Gott verlassen sollen / vnd spricht. Der **HERR** ist



ist ein Recher / vnd für im gilt kein  
ansehen der Person / Er hilfft dem  
Armen / vnd sihet keine Person  
an / vnd erhöret das gebet des be-  
leidigten / Er verachtet des Wai-  
sen Gebet nicht / noch der Wid-  
wen / wenn sie klaget. Die Ehre-  
nen der Widwen fließen wol die  
Backen herab / sie schreien aber  
vber sich / wider den / der sie her-  
aus dringet. Das Gebet der E-  
lenden dringet durch die Wolcken /  
vnd lest nicht ab / biss hinzukompt /  
vñ höret nicht auff / bis der Höchste  
drein sehe. Vnd der Herr wird  
recht richten vnd straffen / vnd  
nicht verzeihen / noch die lenge lei-  
den / biss er dem vnarmherzigen  
die lenden zerschmettere / vnd sich  
an solchen Leuten reche / vnd ver-  
tilge alle / die jene beleidigen / vnd  
die



Die gewalt der vngerechten stürcke/  
vnd gebe einem jeglichen nach sei-  
nen wercken/vnd lohne ihnen/wie  
sie es verdienet haben/ vnd Reche  
sein Volck/ vnd erfreue sie mit sei-  
ner Barmherzigkeit.

Wolt Gott es nemen diese  
Wort zu hertzen die Menschen /  
von denen der heilige Geist im  
Buch der Weisheit am 2. Capit-  
tel meldet / derer Wort er auch er-  
zehlet/die da sagen / Last vns den  
armen gerechten oberweldigen/vñ  
keiner Widwen noch alten Man-  
nes schonen. Last vns der alten  
Greisen straff nicht achten / Was  
wir nur thun können/das sol recht  
sein / Denn wer nicht thun kan  
was in gelüftet/der gilt nichts/etc.

Der H E R R E Christus  
spricht im Euangelio / Matthei  
am



am 5. Selig sind die da Leide tra-  
gen/denn sie sollen getröstet wer-  
den. Dieses Sprüchleins ha-  
ben sich anzunehmen alle Widwen  
vnd Waisen / so im bestendigem  
Glauben vnd Christlicher gedult  
ir trübsal tragen / vnd darunter  
Gott vmb Gnad vnd beystand  
anruffen.

Diss ist das ander Theil / zu  
reichem vorsorg der Widwen vnd  
Waisen gehörig / Darinnen zu  
sehen / wie mit Gnadenreichen  
verheischungen vnser trewer Got  
die elenden vor lengst/von anfang  
der Welt her / gar wol hat bedacht  
vnd versehen.

Zum dritten / gehören zu besse-  
rem trost vnd vorsorg aller Gott-  
liebenden Widwen vnd Waisen /  
die



Die herlichen Exempel der Göttlichen schrift / In welchen zusehen/wie Gott der H E X X seinem Wort vnd zusage wirklich ist nach kommen an den Elenden.

In ersten Buch der Könige am 17. Capitel wird gedacht der herrlichen Geschicht von der Widwen zu Sarepta / die in der grossen theurung sampt irem Sohne so bedrenget was / das nur eine Hand voll Mehls / vnd ein wenig öle im Kruge / ir gantzer Vorrath war / Da sie aber den Propheten Eliam mit ir zu Hause einnimpt / vnd auff Gottes befehlich aufftreget / was noch vbrig war / Wird ir zugesagt in Gottes namen / das Mehl im Sad sol nicht verzehret werden / vnd dem ölkrug sol nichts mangeln / biss auff den Tag / da  
der



der H E X X regnen lassen wird  
auff Erden.

Desgleichen wird ferner von  
dieser Widwen gemeldet/ Das da  
jr Son Kranck worden / vnd mit  
Tod verblichen/ habe sich der Pro-  
phet Elias ihrer erbarmet / vnd  
G D E so herzklich ober ihme an-  
geruffen/ das der Son wider Le-  
bendig worden ist / Dafür die  
Mutter ihme sonderlichen danck  
thut/ vnd spricht zu Elia / Tu er-  
kenne ich das du ein Man Gottes  
bist ( Sie redet viel bescheidener  
vom ministerio / denn unsere  
Schwenckfelder) vnd des H E r r n  
Wort in deinem Munde ist War-  
heit. Was an dieser Widwen  
durch den Propheten Eliam für  
gutthete bewiesen/ das thut Gott  
noch heut an allen dürfftigen vnd

E

Elen-



Elenden / durch trewe Lerer vnd  
Prediger des Namens Jesu Chri-  
sti / lesset sein Wort nicht leer ab-  
gehen / es bringet allezeit reiche  
frucht / Tröstet die verzagten Ge-  
wissen / Stercket die müden vnd  
krafftlosen / Erfrewet die betrüb-  
ten vnd trawrigen.

Das ander Buch der Könige  
im 4. Cap: gedencet einer Wid-  
wen/die einen Propheten zur Ehe-  
gehabt/die klaget dem Propheten  
Elisa ihre noth / Nemlich das ihr  
Schuldherr ire beide Söne wöl-  
le nemen vnd zu eigen Knechten  
machen/Elisa theset ir trewe rath  
mit / das sie den Schuldherrn  
fondte bezalen / vnd behielt noch  
vbrig/sich vnd ire Söne/damit zu  
eruehren.

Debora eine Widwe ober-  
windet



windet durch ihren Glauben den  
Hoffertigen Hauptman Sisse-  
rum. Ruth erlanget durch ihren  
Glauben den fromen Man Bo-  
as / vnd wird also ein alt Mutter  
des HErrn Christi.

Die löblich geschicht von der  
Zugentsamen Widwen Judith /  
ist ein recht Widwen spiegel / dar-  
innen all jr Leben / vnterhaltung  
vnd Trost deutlich verfasst wird.

Im Euangelio Marci am 12.  
Cap: wird gedacht / das der Herr  
Jesus im Tempel sich gegen dem  
Gottskasten gesetzt habe / vñ zuge-  
sehen / wie das Volck einlegte / Vnd  
da viel Reichen viel einlegten / eine  
Arme Widwe aber zwey scherff-  
lein / die einen Heller machten /  
einlegte / sprach er zu seinen Jün-  
gern / Warlich ich sage euch / diese  
E ij Arme



Arme Widwe hat mehr in Gotteskasten gelegt / denn alle die eingelegt haben. So weis der HERR Christus der armen Widwen vnd Waisen vermögen / vnd jr weniges vnd geringes / Ja ire Scherfflein achtet er höher / denn der andern Geitzwenste schecke: Sihet er auff jr vermögen / wie viel mehr auff ihre Seelen / Herzen vnd Gebet.

Wie herzlich jammerte den HERRN Christum das Leid der Widwen zu Nain / wie freundlich spricht er jr selber zu / Weine nit / tritt hinzu / rühret den Sarcck an / vnd ruffet irem Sone / Jüngling / Ich sage dir stehe auff / Vnd der Todte richtet sich auff / vnd fieng an zu reden / vnd er gab ihn seiner Mutter.

Die



Die Geschichte der Aposteln  
rühmen vieler heiligen Widwen  
wolthaten / den Aposteln / Paulo  
vnd Petro / erzeigt / die ohne zweif-  
fel sich ihres Leids / bey der Predigt  
des heiligen Euangelij erholet ha-  
ben / vnd Trost begeret.

Wie reichlich tröstet vnd fre-  
wet sich die fromme Hanna / eine  
Widwe / bey vier vnd Achtzig Ja-  
ren / vber dem Newgebornen Kö-  
nige Jesu Christo / Das sie auch  
hinzu getretten / neben dem Alten  
Simeone / Gott den HErrn ge-  
preiset hat / vnd geredet zu denen /  
die auff die Erlösung zu Jerusa-  
lem warteten.

Der heilige Augustinus er-  
wehnet oft seiner lieben Mutter  
Monica / die eine betrübtete Widwe  
gewesen / Die hat GOTT der  
E iij HErr



S E R R nach vielem Leid/ trüb-  
sal vnd noth/ wunderbarlich wi-  
derumb getröstet.

Zum Vierden / ist das förne-  
me Theil des Trosts vñ des Gött-  
lichen versorgs / vor die Widwen  
vnd Waisen bestellet / in den öffent-  
lichen straffungen vnd bedrew-  
ungen / die Gott in seinem Wort  
lest von sich lauten vber alle die / so  
Widwen vnd Waisen verforthei-  
len vnd engsten. Den Gott wil  
nicht alleine schlecht an seiner gü-  
te vnd Barmherzigkeit erkennen  
vnd geehret sein / sondern wil nach  
dieser auch / das sein Zorn vñ  
grim bösen vnd fromen bekandt  
sey / den Fromen zu trost vnd erin-  
nerung / den Bösen zum schrecken  
vnd furcht.

Der



Derhalben ist tröstlich Wid-  
wen vnd Waisen zu wissen / Gott  
der HErr zürne auff die / so sie be-  
leidigen / Vnd wollen des etliche  
Zeugnis der heiligen Schrift hö-  
ren. Drogen ist angezeiget / wie  
im 2. Buch Mosi / Got dretwet  
denen / so Widwen vnd Waisen  
bescheden / da er spricht / Mein  
Zorn wird ergrimmen / das ich  
euch mit dem Schwert tödte / vnd  
euer Weiber Widwen / vnd euer  
Kinder Waisen werden. So za-  
let GDE mit barer Münz ab /  
was wir an Widwen vnd Wai-  
sen vns vergreifen / das haben  
onser Weib vnd Kind auch zu  
fürchten.

Esaie am 10. Cap: dretwet Gott  
mit den Worten: Weh den schrift-  
gelerten die vnrechte Gesetze  
E iij machen /



machen / vnd die vnrechte vrtheil  
schreiben / auff das sie die sachen  
der Armen beugen / vnd gewalt  
vben im Recht der Elenden vnter  
meinem Volck / Das die Widwen  
ir Raub / vnd die Waisen ire Beu-  
te sein müssen.

Hieremiae am 5. Cap: spricht  
Gott der HERR: Man findet  
vnter meinem Volck Gottlosen /  
die den Leuten stellen / vnd Fallen  
zurichten / sie zu fahen / wie die  
Bogler thun mit kloben / Vnd ire  
Heuser sind voller Tücke / wie ein  
Bogelbauer voller Lockvogel ist /  
Daher werden sie gewaltig reich /  
Fett vnd Glat. Sie gehen mit bö-  
sen stücken vmb / Sie halten kein  
Recht / Den Waisen fördern sie  
seine Sachen nicht / vnd gelinget  
sien / vnd helfen dem armen nicht



zu Recht. Solt ich den solches  
nicht heimsuchen / spricht der  
HERR? Vnd meine Seele solt  
sich nicht rechen an solchem Volck /  
wie dis ist?

Item im 15. Cap: Du hast  
mich verlassen spricht der Herr /  
vnd bist mir abgefallen / Drum  
hab ich meine Hand ausgestreckt  
wider dich / das ich dich verderben  
wil / Ich bin des erbarmens müde.  
Ich wil sie mit der Worffschauffel  
zum Lande hinaus worffeln / Vnd  
wil mein Volck / so von seinem we-  
sen sich nicht beferen wil / zu eitel  
Waisen machen vnd vmbbringen /  
Es sollen mir mehr Widwen vn-  
ter inen werden / denn des Sand-  
des am Meer ist / etc.

Item im 22. Cap: So spricht  
der Herr / Haltet Recht vnd ge-  
rech-



rechtigkeit / vnd errettet den be-  
raubten von des freuelers hand/  
vnd schindet nicht die Frembdlin-  
ge / Widwen / vnd Waisen / vnd  
thut niemandt gewalt / vnd ver-  
geussset nicht vnschuldig Blut an  
dieser stedt. Werdet ihr solches  
thun / so sollen durch die Thor die-  
ses Hauses einziehen Könige / die-  
auff Davids Stuel sitzen / beide  
zu Wagen vnd zu Rosse / sampt  
ihren Knechten vnd Volck. Wer-  
det ir aber solchem nit gehorchen /  
so habe ich bey mir selbs geschwo-  
ren (spricht der HErr) diss Haus  
sol verstorret werden.

Ezechiel der Prophet im 22.  
Capitel Predigt also: Sihe / die  
Fürsten in Israel / ein jeglicher  
ist mechtig bey dir Blut zuuer-  
giessen. Vater vnd Mutter ver-  
achten



achten sie / den Frembdlingen thut  
sie gewalt vnd vnrecht / Die Wid-  
wen vnd Waisen schinden sie.  
Du verachtest mein Heiligthumb  
vnd entheilgst meine Sabbath.  
Sihe / ich schlahe meine Hende zu-  
sammen / vber dem Geitz den du  
treibest / vnd vber das Blut / so in  
dir vergossen ist. Meinstu aber  
dein Hertz möge es erleiden / oder  
deine Hende ertragen / Zu der zeit /  
wenn ichs mit dir machen werde ?  
Ich der HErr habß geredt / vnd  
wilß auch thun / vnd wil dich zer-  
strewen vnter die Heiden / vnd  
dich verstossen in die Lender / Vnd  
wil deines vnflats ein ende ma-  
chen / das du bey den Heiden muß  
verflucht geacht werden / vnd erfa-  
ren das ich der HErr sey.

Der 94. Psalm / lautet vnter  
an-



andern also: **HERR** sie zuschla-  
gen dein Volck / vnd plagen dein  
Erbe. Widwen vnd Frembdlin-  
gen erwürgen sie / vnd Tödtten die  
Waisen / vnd sagen / Der **HERR**  
sihets nicht / Vnd der Gott Jacob  
achtes nicht. Merckt doch jr  
Narren vnter dem Volck / vnd jr  
Thoren / wenn wolt jr Flug wer-  
den? Der das Ohre gepflanzet  
hat / solt der nicht hören? Der das  
Auge gemacht hat / solt der nicht  
sehen? Der die Heiden züchtiget /  
solt der nicht straffen?

Beim Propheten Malachia  
am 3. Cap: Dreyet Gott mit den  
worten: Ich wil zu euch kommen  
vnd euch straffen / Vnd wil ein  
schneller zeuge sein / wider die Zeu-  
berer / Ehebrecher vnd Meineidi-  
gen / vnd wider die / so gewalt thun  
den



den Tagelöhnern / Widwen vnd  
Waisen / vnd den Frembdlingen  
drücken / vnd mich nicht fürchten /  
Spricht der HERR.

Der HERR Christus im  
Euangelio / Matthei am 23. Cap:  
saget / Wehe euch Schriftgeler-  
ten vnd Phariseer / Ir Heuchler /  
die jr der Widwen Heuser fresset /  
vnd wendet lange Gebet für /  
Drumb werdet jr desto mehr ver-  
damnis empfahen.

Hieben ist die Frage / Wer  
sind denn die / so Widwen  
vnd Waisen am meisten  
plagen vnd eng-  
sten ?

Weil



**W**eil wir die Wahrheit aus-  
sagen / wollen wir fleis an-  
keren / damit öffentlich er-  
kant werde / welches der Widwen  
vnd Waisen verdrücker sind.

Erstlich haben etlich Hundert  
Zar daher / das vnnütze Geistlose  
Gesinde der Mönche / Heuchler /  
falsche Lerer / so ins Antichristen  
gebiet gehörig / vnd zu seiner præ-  
benden oder Küchen dienstlich /  
vnzlichen Diebstal vnd gewalt  
geübet / an der Widwen vnd Wai-  
sen Güter / da sie ohn allen grund  
Göttliches worts ober alle / wo  
die Bauchgößen sich nider gelas-  
sen / meliorem partem an Widen-  
mitten / Zinsen / Heusern / haben  
ausgesehen / vnd einfeltige Her-  
zen / mit Lügen vnd list oberredet /  
das sie inen an irer Narung vnd  
iren



iren nachkommenen / selber geschaa-  
det / grosse Gestift / Rente / Zin-  
sen / auffm Lande vnd Stedten /  
zu vnterhaltung der Maffsen /  
auffgericht. Vnd haben vn-  
sere liebe Alten anders nicht ge-  
meinet / es solten dauon Leute er-  
zogen werden / die Gott dienen /  
vnd es würde inen solch Werck die  
ewige Seligkeit vnd vergebung  
der Sünden erwerben: Wie aber  
die andacht vnd der anschlag ge-  
raten / ist leider offenbar gnug / das  
die aus den Allmosen vnd patri-  
monio Christi sich neeren / offent-  
liche Feinde des heiligen Euangelij  
vom waren Erlöser Jesu Christi  
sein: Ich geschweige die vnzucht /  
Pracht / Vppigkeit / Spielen / Top-  
peln / fressen / Sauffen vnd andere  
vnzellige vbel / die sie sonstē darbey  
treiben



treiben / Da Gottes langmütig-  
keit zu erkennen ist / der so lange  
hat können bey solchen Sodomi-  
tischen wesen zusehen / vnd gedül-  
dig sein.

Unsere liebe gros Eltern / ha-  
ben iren nachkommen gar einen  
schweren Besem auff den Hals  
geleget / Da man heut nit viel  
Heuser / Güter / etc. in Land vnd  
Stedten findet / die nicht dem vn-  
nützen hauffen / so weder GOTT  
noch der Welt mit gutem Gewis-  
sen dienen / was verpflichtet we-  
ren. Ach wie viel sind der Armen /  
so wegen solcher vnzimlicher be-  
schwerung von Haus vnd Hoff  
gedrungen werden.

Darnach beschweren Wid-  
wen vnd Waisen die vnchristli-  
chen Richter / so offft vnerkandter  
sachen /



sachen / aus Neid / Zorn / vmb ge-  
schenck willen / wegen ansehen der  
Person / den Elenden helffen mit  
vnbillichem Vrtheil bedrängen.  
Hieher gesellen sich die vnnützen  
Wescher vnd Zungendrescher / die  
wegen eines kleinen genießes / hel-  
fen vngerechte Sachen fördern /  
die vnschuldigen verleumbden vnd  
verhetzen.

Zum dritten / findet man auch  
offt solche Obrigkeit / die den Ar-  
men Widwen vnd Waisen nach  
abscheid des Hauswirts / jr Haus  
vnd Güter abdringen / Feil ma-  
chen / mit gewalt dahin halten / so  
sie bar Geld haben / das sie solches  
herfür suchen / vnd inen oberant-  
worten müssen. Es sind auch /  
so die Todten Leichen pflegen zu  
schätzen / Vnd nicht eher auff den  
S Kirch



Kirchoff lassen begraben (so sie Reich gewesen) man gebe ihnen denn auch ein Tribut darvon.

Zum Bierden / folgen denen die vntrewen Vormünder / so mit Widwen vnd Waisen gar leichtfertig vngehen / sehen das sie die beste Beut behalten / Sie sollen an stelle des Vatern geordnet sein / vnd Stelen erger denn ein Reuber auff der strassen.

Zum Fünfften / sind auch etliche Reiche so verschmitz / beflissigen sich mit grosser mühe / das wo Widwen vnd Waisen verhanden / sie inen die Güter abdringen / bey denen sie aus Christlicher liebe dieselben billich erhalten solten / leihen Geldt darauff / aber das letztlich ihnen das Gut gar bleibe.

Zum



Zum sechsten/die vngeduldigen  
Schuldherren / so armen Waisen  
mit fristen den Termin zur zalung/  
sondern ohne barmhertzigkeit da-  
hin halten/das sie offft mit schaden  
das ire verwerffen müssen. Sol-  
che Gesellen geben offft durch iren  
Geiz vrsach/ das ein armer Man  
von Weib vnd Kindt leuffet ins  
Elend/kömpft gar nicht wider.

Zum siebenden / sollen wir hie  
auch nit vergessen vngehorsamer  
Kinder / die ihren Müttern / als  
Widwen viel leids machen / inen  
auch desto eher zur Grube helffen.  
Auch mag ein Christ bedenccken/  
was unsere stolze Knechte vnd  
Mägde / im Hause Widwen vnd  
Waisen zuschaffen geben. Die fra-  
gen nit viel darnach/ da gleich das  
heupt/der Wirt vn Herr im Haus  
S ii noch



noch lebet / solten sie denn was gu-  
tes backen / da niemand ist für dem  
sie sich dürffen fürchten. Mich  
düncft wir haben das recht haus  
purgatorium bey vnsern zeiten  
am Gesinde / zu besorgen / Gott  
werd Landt vnd Leut vmb der  
schrecklichen bosshheit vnd vntrew  
des Gesindes willen / straffen.

Letzlich gehören hieher die Wi-  
derteuffer / die ihr Weib vnd Kind  
ins sichtige Elend des zeitlichen  
vnd ewigen Lebens führen / machen  
sich mitwillig zu Waisen / elenden  
Leuten vnd Landleuffern. De-  
nen sind nit vngleich unsere Müs-  
siggenger / die vber die Wochen  
das ire versauffen vnd verspielen /  
vnd darnach daruon in andere  
Land lauffen / lassen Weib vnd  
Kind hinder sich in fleglicher noth /  
Das



Das sind schendliche Leidmacher/  
die gar schwere Rechenschafft  
Gott geben werden / das sie ihre  
Eid vnd Ehepflicht so vbel gehalten  
ten / vnd muthwillig zu grossen  
jammer Ursach geben.

Diss ist gesagt vom Trost vnd  
vorsorg der Widwen vnd Wai-  
sen / der inen aus Gottes gnad in  
seinem heiligen Wort auff's rich-  
tigste eingeleibet vnd bestellet ist.

## Das Dritte Theil.

Vom Ampt vnd Leben Christli-  
cher Widwen vnd Waisen.

**Z**um eingang dieser Le-  
hre wil ich alle Gottselige Ehe-  
leutlein erinnert haben / das sie  
ja wol behertzen die öffentliche  
F ij vnd



vñ gemeine erfahrung vñ ordnung  
Gottes. Denn die liebe Sonne  
so lange den Tag nicht scheinen  
kan/sie muss doch zu letzt ein mahl  
zu raste gehen / vnd die trawrige  
Nacht herein fallen. Da denn am  
obelsten dransint / die jr thun vnd  
fürhaben nicht darnach angestel-  
let / oder wo sie zu Nacht bleiben /  
vnd den frölichen Morgen wider  
erwarten wollen / nicht bedacht  
haben : Also kan die Liebe vnd  
freundliche beywohnung fromer  
Christlicher Eheleute/so gross vnd  
herzlich nicht sein / es kan auch  
nicht so lange wehren / wenn sie  
gleich viel Jhar bey einander wo-  
nen / sie müssen doch zulezt von  
einander scheiden. Wenn sie zu-  
vor solches nicht bedacht haben/  
vnd geduldig in Gottes willen ge-  
stellet /







vnd fromer Gott/ Ich dancke dir/  
das du mich so wol versorget/ vnd  
in den Stand der heiligen Ehe sel-  
ber mit deinem Wort vnd Ordnung  
hast eingesetzt/ ein Züchtig vnd  
Zugentsam Gemahl/ daran ich  
viel lust vnd freude habe/ besche-  
ret. Ich erkenne aber das vnser  
beider Leben vnd wolfarth in dei-  
nen henden stehet/ Du bist der  
Scheideman/ der durch den zeitli-  
chen Todt die freude kanst stören:  
So bitte ich deine Väterliche gna-  
de/wollest mir/sampt meinem Ge-  
mahl/ nach deinem heiligen wil-  
len/ disß dürfftige Leben fristen  
vnd lenger vergönnen bey sam-  
men zu wohnen/ Doch mit dem  
beding/ das wir deiner Göttlichen  
Ehren/ deiner Kirchen/ vnd vnse-  
rem Nehesten nützlich vnd dienst-  
lich



lich sein: Vnd von Tag zu Tag  
deinem ewigen Reich auch neher  
zu treten mögen. Endlichen ver-  
leihe das / wenn die zeit des schei-  
dens kömpt / wir vns willig vnd  
gedüldig dir vertrauen / wider  
dich nicht setzen / sondern mit dem  
lieben Job sagen / Der HERR  
hats gegeben / der HERR hats ge-  
nommen / der Name des HERRN  
sey gelobet in Ewigkeit / Amen.

Solche tegliche erinnerung  
ist zu vielem gut: Denn so Eheleut  
meinen / es sol das Zucker Jar / der  
Küssmonden / stets weren / vnd  
vergessen des scheidens / kömpt sie  
denn das Leid schwer an. Ein tre-  
wes Gemahl sol dem sterbenden  
den letzten dienst in der Welt lei-  
sten / mit trost aus Gottes Wort /  
mit Beten / vnd anderer fleissiger

F v war-



wartung / Wo solches nicht ge-  
schicht / vnd eitel geschrey / Heu-  
len / Weinen / vnd vngedult von  
sich sehē lassen / kan oft das Kran-  
cke dadurch mehr geschwecht wer-  
den. Wir kommen mit lieben zu-  
sammen / billich scheiden wir auch  
mit lieben vnd gutem willen von  
einander.

Darnach sollen Eheleutlein  
wissen / das vnser verstorbene  
vnerloren sind / werden allein  
aus diesem sterblichen Gefengnis  
des Leibs / in ein Herrlich Para-  
dis / aus dem Tod zum Leben / aus  
der Hellen vnd qual dieser Welt /  
in Himmels der ewigen Herrlichkeit  
abgefördert / entfliehē allem trüb-  
sal vnd elend / sollen widerumb an  
Leib vnd Seel zur ewigen Herr-  
lichkeit am Jüngsten Tage einge-  
füret



füret werden. Darzu ist disß zeitliche sterben vnd einschlaffen nicht der rechte eigentliche Todt: sondern nur das schrecken für dem Todt/ das man im Leben vber fület/ das heisset der Tod. Wer nu an Christum gleubet/so heisset es also / Johan: am 5. Warlich ich sage euch / Wer mein Wort höret / vnd gleubet dem der mich gesandt hat / Der hat das ewige Leben / vnd kömpt nicht ins Gericht / sondern er ist vom Tod zum Leben hindurch gedrungen. Davon leret vns viel der Artickel von vnser aufferstehung.

Ferner / in mittler zeit / weil Gott der **HEXX** mit dem Todtsstündlein auffzeucht / sollen Eheleutlein besammen sich in Gottes fürcht nehren / Zusehen / das sie ein-



sie einander durch vntrew / Neid /  
Zorn / Widerswillen / nicht das  
Herze selber fressen. Ich habe viel  
Weiber hören klagen / nach ab-  
scheid irer Ehemer / das sie ge-  
sagt / Ach wen mein Mann mir jzt  
solt leben / wie wolt ich ihnen ver-  
halten / da es es könnte sein / ich wolt  
inien mit Nadeln ausgraben. Da  
aber der arme Mann lebete / musste  
er offters hören / Du bist mein nie  
werdt worden / Ich halt der Teuf-  
fel hat mich zu dem Mann gefurt /  
er ist nicht werdt / das in die Erde  
tregt / Ich wolt das in dieser vnd  
senner holete. Ich geschweige  
mit was groben verdacht / der ar-  
me elende Mann beim Schencken  
vnter den Schepsnumen / vnd  
sonsten / von seinem eigen Weibe  
ist ausgehrien worden / Da er  
nu



nu etliche Ellen vnter der Erden  
ligt / da ist er erst tüchtig worden.  
Solche Exempel erföhret man  
auch herwider von den Ehemennern/  
wenn sie sich Verheyraten/  
vnd riech mit kömpt / Beflaget  
man des ersten Weibes abscheid/  
da fordert man sie auch wider / die  
zuuor keinen danck oder guts kon-  
te verdienen.

Darumb sehen Eheleute  
zu / das jr Ehebett nicht durch  
Hader / Zanck / schand vnd Sün-  
de befleckt werde / das sie der zeitli-  
che Tod in der Liebe vnd einigkeit/  
die Gott gefellet / antresse. Bey  
solcher Liebe sollen sie auch ihrer  
Kindelein fleissig warten / diese zur  
Kirchen / Schulen / zu Gottes  
furcht / ehrlicher handtierung /  
vnd nicht zu müßiggang / Hoffart  
Lügen/



Lügen / Stelen / umblauffen hal-  
ten .

Es ist auch gut das Eheleut-  
lein radtsam sein / samlen auff die  
noth / von dem was Gott besche-  
ret / die Armen teglich bedencken /  
vnd darnebe die vbrigen Brocken  
auffheben / nicht verschwenden /  
vnd vnnützlich mit vbriger zerung  
hindurch jagen.

Zuor aus aber / seid jr lieben  
Eheleutlein mit ewren Kindern  
gewarnet / das ihr gleich bey ew-  
rem wolgehen / Leben / Handel vnd  
Wandel / Widwen vnd Waisen  
nicht verspottet / betrieget / oder  
sie etwan bedrenget. Denn ge-  
meiniglich zalet Gott der HErr  
also abe / das / wodurch wir vns  
an ime vnd vnserem Nechsten ver-  
griffen haben / das kompt vns sel-  
ber



ber wider zu Hause. Der viel  
spottens / lesters / schendens vnd  
raubens kan / sol / laut Göttliches  
Worts / wider sampt den seinen / so  
sime hiezu gefolget vnd gedienet /  
beraubet vnd verspottet werden.  
Darumb liebet vnd helffet Wai-  
sen vnd Widwē gerne / so wird sich  
Gott ewer in gnaden wider vnter  
gleichem anligen erbarmen.

Auff solchen Parasceuen oder  
vorbereitung wem die stund des  
scheidens kompt / spreche ein Ge-  
mahl dem andern freundlich zu /  
Wolan / mein trewes Hertz / die  
Stunde des scheidens ist verhan-  
den / Ich dancke dir trewer liebe /  
hülff / rath vnd dienst / mir erzeigt /  
Der ewige Gott wolle dars im E-  
wigen Leben vergelten / Siehe / ha-  
be Gott für augen / zeuch die kind-  
lein



lein zu Gottes fürcht / gedencke  
mein im besten / Vnd wenns der  
Himlische Vater haben wil / kom-  
me sampt inen vnd allen glaubigen  
in rechtem Glauben an den Wa-  
ren Erlöser Christum seliglichen  
hernach / da wir am Jüngsten Ta-  
ge einander freundlicher vnd bes-  
ser gemut / wollen zusprechen / vnd  
ewige gesellschaft einander leisten /  
Ach darzu helffe der H. Erre Jhe-  
sus / vnser Leben / Weg vnd War-  
heit / dem ich jzt mein Seelichen  
befehle in seine Hende / Amen.

Wen der Abscheid in Gottes  
Namen geschehen / sol das ander  
theil / Widwer oder Widwe / mit  
gedult Gott dem H. Erren stille hal-  
ten / wider seinen willen nicht vn-  
geduldig sein / denn damit bessern  
wir die sache nicht / Natürlich ist es



zu trawren / seines lieben nicht zu-  
uergessen / doch sol Gott der aller-  
liebste bleiben / denen wir aus sei-  
nem Wort vns sollen lassen tre-  
we Seelsorger vnd Prediger für-  
tragen / iren Trost vñ vermanung  
annemen vnd folgen. Vnd weil  
wir zuuor der Widwen vorsorg /  
vnd Trost gehandelt haben / wol-  
len wir hie im letzten theil sagen /  
Was einer Widwen für ire Per-  
son in irem Stand zu thun zu-  
stehe.

Der heilige Paulus schreibet  
von der Widwen Leben also / 1.  
Timoth. 3. Eine rechte Widwe die  
Einsam ist / stellet ir hoffnung auff  
Gott / bleibet im Gebet Tag vnd  
Nacht. Welche aber in wollüsten  
lebet / die ist lebendig Todt. Hie-  
mit legt der Apostel dreyerley fro-  
men

G

men



men Widwen auff/ Erstlich/ sollen  
sie sich recht vnd wol gegen Gott  
halten/ Darnach gegen sich selbs/  
Zum dritten / gegen andern Leu-  
ten.

Gott dem HErrn sind Wid-  
wen schuldig / mit allen andern  
Christen / im rechten Glauben/  
warer Gottes furcht / vnd herz-  
lichem Gebet/ stets zu dienen / vnd  
ob solchem dienst/ hat er ein gnedi-  
ges gefallen / vmb Christi vnsers  
gnugthumers willen/ Nach diesem  
sol eine Widfraw auch jr eigen  
Person bedenckē / das sie sich nicht  
in gefahr vnd schande stecke / Sol  
jr an jren ehren vnd guten namen  
lassen viel gelegen sein / als an ei-  
nem solchen Schatz/ der mit nichts  
zumer gleichen/ oder zubezahlen ist.  
Solches zuerhalten/ ist billich/ das  
Wid-



Widwen vnd Waisen für jr eigen  
Person / fleissig zur Kirchen vnd  
Predigt gehen / das gehörte Wort  
Gottes betrachten / sich darmit  
trösten / vnd ihr Leben dahin rich-  
ten / das es in Christlichem gehor-  
sam / nach **G D E E S** Wort  
gehe / sich für allem oberflus hü-  
ten / vnd alle böse gesellschaft mei-  
den / Sich messig in Kleidung /  
Essen vnd Trincken halten / vnd  
für allen dingen den müßiggang  
fliehen. Belangende andere Leut/  
haben sich auch Widwen wol für  
zu sehen / Denn die Welt ist gar  
verderbt / vnd drumb vnmüglich/  
das jr einer köndte alles zu gefal-  
len machen / denn sie ist Gott auch  
selbs feind / vnd erzürnet sich desto  
heftiger / wenn man thut was  
Gott heist vñ befihlet / doch nichts  
**G ij** desto



desto weniger sol sich ein jeder  
Christ in Worten / Wercken vnd  
Geberden / also halten / das nie-  
mand mit Warheit in tadeln / oder  
etwas böses auff in mit recht brin-  
gen könne. In sonderheit stehet  
Widwen zu / das sie andern Wei-  
bern / noch niemand / nicht ergerlich  
sein sollen / Ein züchtig / Ehrbar-  
lich Leben führen / damit andere jün-  
gere Weiber vnd Jungfrauen gu-  
te sitten vnd geberden von inen ler-  
nen.

Zum beschlus sind alle Waisen  
hie zu erinnern / Erstlich / das sie  
auch vnter irem elend Gott fürch-  
tig vnd geduldig sein / an iren stand  
dencken / vnd sich für Gottlosigkeit  
vnd mißwillen hüten / gerne Be-  
ten / vnd Gottes Wort mit lust  
lernen.

Zum



Zum andern / sollen sie gehor-  
samen der Obrigkeit / Vormün-  
den / Schul vnd Lehrmeistern / so  
sich ihrer annemen / sie schützen /  
irer pflegen / vnd was nütliches  
vnterweisen / Für vnblaffen /  
müßiggang / stelen / kaupteln / lie-  
gen / Schweren / widerbellen / vnd  
anderen bösen tücken / als für des  
Teuffels betrug hüten / Auch irer  
betrübtten Mutter durch gehor-  
sams das Leid helffen lindern.

Zum dritten / für allen Men-  
schen ein eingezogenes Leben fü-  
ren / nicht weschurig sein / Auff al-  
len Pleken stehen / vnd die Leut  
ausschätzen / Nicht alle Fastnacht  
vnd Narrenspiel helffen vollbrin-  
gen / Sondern auff iren wunckeln  
daheim bleiben / was nütliches ler-  
nen vnd vorhaben.

G iij Gebet



## Gebet vor die Widwen.

**D**u gewaltiger vnd ewiger  
Gott/ bey dem alle Elende  
vnd betrübtte Herzen von  
anfang her / hülff vnd Trost gesu-  
chet/ vñ erlanget haben / Ich arme  
Sünderin wende mich in hertzli-  
chem vertrauen auff deinen lieben  
Sohn meinen Erlöser / Ihesum  
Christum/ jetzt in meinem anligen/  
zu deiner Väterlichen güte / vnd  
bitte hertzlich / wollest mich in dei-  
nem Gnadenschutz regieren / er-  
halten / mich in meinem elend trö-  
sten/ vnd nicht verlassen/ Amen.

**H**imlischer Vater / der heilige  
Paulus nennet dich einen  
Gott alles Trosts/ so komm  
ich dürfftiges Mensch deines Tro-  
stes



stes zu geniessen/ Dinn mich auff  
vor einen Erben deines Reichs/  
zehle mich vnter das heufflein/ dei-  
ner auserwehlten / damit ich aus  
diesem Jammer/eines erlöset/ewi-  
ge Herberge bey dir finde / Durch  
Ihesum Christum meinen Ho-  
henpriester vnd Seligmacher/ A-  
men.

**D** Armherziger Gott / ich  
dancke dir / das du mich in  
krafft diesem Leben / durch die  
deines Worts zum Eheli-  
chen Orden vñ Stand hast einge-  
segnet. Vnd weil es deinem heilige  
willen gefellig gewesen / das mein  
Ehegenoss / so du mir zum schutz  
vnd Heupt in dieser Welt ein zeit-  
lang gestellet hast / von mir ge-  
scheiden / So halt ich ferner  
G üij an



an dich / als an das ewige Haupt:  
Weil du mich zur Widwen ge-  
macht / wollest mi auch das beste  
bey mir thun / Mich / meine Kind-  
lein / meine Habe vnd Gut / vor  
das deine halten / vorm Teuffel /  
bösen Menschen gnedig behüten /  
vnd verleihen im rechten Glauben  
fort zu machen / dahin zu eilen / da  
ich mein Lieb mit freuden in ewig-  
keit wider sehen werde / Amen.

**D** Gütiger Vater / in des  
Hand aller Menschen her-  
ken auff Erden stehen / ver-  
leihe durch deinen Segen / das  
mich verlassenes Mensch vmb dei-  
ner willen / Christliche Obrigkeit /  
Vormünder / Blutsfreunde /  
vnd andere frome Christen / Lie-  
ben Herbergen / helffen fördern /  
vnd



vnd bey meinem Recht erhalten/  
entlich frölich beschliesse / vnd in  
dein Reich einziehen möge / vmb  
Jesu Christi meines Erlösers wil-  
len.

**H**ERR Ihesu Christe / das  
du dich am Stamme des  
Creuzes / von aller Welt  
vnd Creaturen verlassen / befla-  
gest / schreiest du vor mich arme  
Widwe / vnd vor alle recht verlas-  
sene auff dieser Erden / O verleihe /  
das dein bitteres Leiden / in allem  
Trübsal mein Trost / Freud / Er-  
quickung sey / Amen.

**H**eiliger Geist / du beystand  
der verlassenen / kome mit  
deiner Gnaden / Trost / vnd  
erhalt mein krafftlos Herz / das  
ich wider Gott meinen Schd-  
pffer



pffer mit vngedult / verzweiffelung  
vnd andern Vbel / nicht sündige.  
Izt gib / das mir die Predigt Göt-  
lichen Worts zufalle mit den liebli-  
chen Trostsprüchen / in welchen  
mir Gott vnd allen klagenden /  
Troft vnd hülffe anbeut: Weide  
meine Traurige Seele / mit sol-  
cher Speise / das sie gesetigt sich  
zum ewigen Leben schicke. Bewa-  
re mich durch deine krafft / für  
schanden / Sünden / vnd  
Lastern / das der böse  
Feind kein theil an  
mir finde ?

Amen.



Wai-



## Waisen Gebet.

**E**rhallerliebster Vater im  
Himmel/ weil du auch der Un-  
mündigen vnd Seuglingen  
Stimmen vnd Gebet erhörest/ so  
schreye ich armer Waise heut auch  
zu dir / Vnd bitt Vergebung mei-  
ner Sünden/beger darneben mich  
in deine Väterliche sorge zu erge-  
ben / Wollest mein rechter vnd  
ewiger Vater sein vnd bleiben /  
mich durch deiner Gnaden  
Werckzeuge zum besten auff-  
ziehen / vnd ein Kind  
der Seligkeit  
sein las-  
sen/

A M E N.

Ich



**I**ch dancke dir ewiger Gott  
vnd Vater / das du mich in  
dieses Leben von ehrlichen  
vnd Christlichen Eltern hast las-  
sen geboren werden / Vnd weil ich  
mit deinem wissen vnd willen ein  
Elender Waise worden bin weis  
ich keinen Vater denn dich allein /  
anzulauffen / Erbarme dich mein /  
vnd gib das ich ein from Mensch  
werde / meinen Seelsörgern / Vor-  
münden / aller ordentliche Obri-  
gkeit / Schul vnd Lehrmeistern ge-  
horsame / das senige lerne / damit  
ich dir / vnd meinem Nehesten mag  
nütze sein: Beware mich durch  
deinen heiligen Engel / vor böser  
gesellschaft / vntugendt / Lügen /  
Stelen / vnd andern Sünden /  
Verleihe das ich im Glauben vnd  
Tugenden recht zuneme / vnd mein  
gantz



gantz Leben nach deinem heiligen  
gefallen anrichte / in Jesu Christo  
meinem Heyland / Amen.

**A**lmechtiger vnd Ewi-  
ger Gott / dem alles  
Creutz / noth vnd anligen  
bekant ist / Siehe als ein lie-  
ber Vater auch auff mein  
Elend / vnd weil mein Leib-  
licher Vater an seiner See-  
len bey dir ruhet / vnd durch  
dich aus diesem Leben ist  
abgefördert worden / So  
dancke ich dir vor alle deine  
gütthet / die du so reichlich  
deiner Kirchen / vnd allen  
gleubi-



allen glaubigen hie auff Er-  
den/erzeigest/auch das du  
meinem lieben Vater ein  
Seeliges ende im Glau-  
ben an Christum verliehen  
hast/bit dich aber von her-  
zen/wollest mir vorleihen  
mit dem fromen Isaaco/  
Dauide/Tobia etc. vnser  
Gros Eltern in dem Him-  
lischen Lustgarten am  
Jüngsten tage mit  
freuden zuscha-  
wen/Amen.

HER



Herr Ihesu Christe als  
du Nackend vnd blos  
am stam des Creuzes hin  
gest/hast du recht der Wai-  
sen Elend vnd Orden er-  
kand / O las mich durch  
dein bitteres Leiden aus  
deiner Vormundschaft  
nicht ledig gezalt werden/  
Sondern beweis an mir  
Armen den Reichthumb  
deiner gnaden/  
Amen.







on  
af









152975

AB 152975

ULB Halle

3

003 015 114



8v

R

VD77












6

**Von Christli-**  
**cher Widwen vnd Waisen**  
stand / Reichem vorsorg/  
Trost vnd Ampt:

Aus Göttlicher Schrift zusammen gezogen.

Durch  
**Esaiam Heidenreich / der**  
Heiligen Schrift Doctor.



**Wittenberg.**

Gedruckt durch Zacharias Lehman,  
Anno M. D. LXXXII.

